



# Tir Yimiyim


www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :



TAPAK 7

Kiren Rijju-i Arunachal nung mountain biking ajungketer

China-i India li atsünga agiba sorkari nangzüksüla: Rahul Gandhi



VOL. XIX NO. 444 (ADOK 444) DIMAPUR AMUNGNÜ (SUNDAY) YIMPOKSÜI (NOVEMBER) 21, 2021

₹ 5.00

## ULB aser Town Council onük atema JCC tenteter

**Dimapur, November 20, 2021 (TYO):** Honibarnü Naga Council Dimapur (NCD) kübok Dimapur nung lokti tentetemi ULB aser Town Council tebilemstü atema senden ka menogo.

Nagaland state sorkari November 18, 2021 nü Nagaland nung Urban Local Bodies (ULB) aser Town Council atema advisory council tentetsüba osang sangoktsüba indang

senden nung benoka lemsatöp. Senden nung adenertemi tebilemba balala lemsatöpba sülen nung lokti tentetemi ULB aser Joint Coordination Committee (JCC) ka tenteta parnok state sorkar den ULB aser Town Council indang onük jembitsü telemtetba agi.

Iba senden nung DUCCF, GB's (Sadar) Union, NWHD, DNSU, DCCI, JCC aser DDCF nung tanishirtem aden.

## NSCN (R) loksa moi shitak dang lir

**Dimapur, November 20, 2021 (TYO):** NSCN (R) loksa moi telok ka dang lir aser NNPGs nung dena lir. Anungji onoki NSCN-R tenüing amshia tentetba telok magizüker, ta tanü NSCN (R)-i metetdaksüogo.

Hokolbarnü Hoito yim nung rongdak senden ka amendang NSCN-R loksa aser NSCN-R telok tasenba nung tir inyaktsü atema Akato Chophi shimba osang metetdaksü.

Telok nungi aridokba vice president Akato Chophi den nisung kari NSCN-R telok ka tentetbaji ozüingi memelar, ta NSCN(R) Speaker Tatar Hoho, Iheshe Aye-i ashi.

"NSCN-R ya 2015 küm Y Wangtin Naga aser P Tikhak lenisüba kübok tentetba lir. Tenaprong ya NNPGs nung co-convenor lir aser onok loksa mao lir. NSCN-R ya sen bushiba masü saka nübor indang telok ka lir. Onoki nübertemi taginüba ama inyaka aotsü" ta Iheshe Aye-i metetdaksü.

Akato-i pa pusemertem teimba lir ta ashibaji tiyazü kechiyong Dimapur nung pa security personnel den züngsem kar dang pa den dena lir. NSCN-R züngsemtem ya Dimapur nung dang masü saka Nagaland ajungalen lir aser unit ajak shitak dang lir, ta Aye-isa ashi.

## COVID-19 Nagaland: 8 dak putet & 12 taneptsü angu

**Kohima, November 20, 2021 (TYO):** Nagaland nung Honibarnü nisung 8 dak COVID-19 aliba putet aser 12 taneptsü angu.

"Tanü puetertemji Dimapur nung nisung 6 aser Kohima o Mokochung nung kaka lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Taoba ghonda 24 tsüingda COVID-19 puteta alir nisung 12 taneptsü angu. Parnokji Dimapur nung 7, Kohima nung 3 aser Tuensang nung 2 lir" ta pai ashi.

Nisung 32,040 rongnungi 30,165 tashi taneptsü nguogo aser ibaji taneptsü angur 94.16% lir ta Dr Kikon-isa shisem.

Tang nisung 127 anepaludar

saka parnok 104 dakbo shirangba yimya kecha mali, ta paisa metetdaksü.

"Hokolbar tashi nung nisung 722,393 nem COVID-19 vaccine indang dose 12,50,399 agütsüogo" ta State Immunization Officer, Dr Ritu Thurr-ia ashi.

Vaccine agirtemji frontline workers 60,976, healthcare workers 15,999, arishi küm 45 ser tempur 204,761 aser arishi küm 18 nungi 44 tsüingda alir 440,657 lir, ta pai metetdaksü.

"Vaccine agirtem rongnung parnok 528,006-i dose anaprong agiogo. Parnokji frontline workers 48,261, healthcare workers 13,469, arishi küm 45 ser tempur 168,344 aser arishi küm 18 nungi 44 tsüingda alir 297,932 lir" ta Dr Thurr-isa metetdaksü.

## NMA-i Tseminyu district kümtettsü mepishir

**Dimapur, November 20, 2021 (TYO):** Rengma Mothers' Association-i Tseminyu District kümtettsü takhangba agütsüba nung Naga Mothers' Association (NMA) dena lir, ta President Abei-Ü Meru-i ashi.

Iba tesem ya putiotsü nungi

tongti süa arur saka küm aika senzuka yutsüogo anungji District ka akümtsü langa lir. Onoki state sorkar dang Rengma nungeri ola adokba angashia kasa temeten aser terenlok agütsütsü mepishir, ta NMA-i metetdaksü.

## Khristmas matongdangsa vaccine agütsütsüba alizüing atongtsüla: Pangnyu



November 20, 2021 nü Conference Hall, Directorate of Health and Family Welfare nung Health Minister S Pangnyu Phom-i District ketdangsürtem den COVID-19 vaccine atema senden amenba angur.

**Dimapur, November 20, 2021 (TYO):** November 20, 2021 nü Health Minister S Pangnyu Phom-i District ketdangsürtem den COVID-19 vaccine agütsüba maparen meyipa repringshidang "Khristmas matongdangsa vaccine agütsütsü alizüing ayuba atongtsüla" ta ashi.

Conference Hall Directorate of Health and Family Welfare nung amenba senden nung District ajak nung vaccine agütsüba osang metetpela aser Har Ghar Dhastak mapa takok ngua inyaktsü jembitep.

"Health workers ajaki küm ana tashi Covid wara anema kanga meranga inyaker saka tenüing agütsür mali. Nenoki kanga meranga inyakba atema pelar" ta Pangnyu Phom-i ashi.

"Asenoki merangaka Covid ajanga asüba nisung teimtiba state ji Nagaland lir aer vaccine agütsüba nung teküpoktiba state

lir. Anungji tanü senden ya Naga nung kümzüka ayutsüba aser jungdaksütsü atema ayonga amener" ta pai metetdaksü.

"Nagaland nung vaccine kanga ajema agibaji nisungtemi nungnangba ajanga lir kechiyong tiyazü osangtem ajanga parnok anisar. Anungji District ketdangsürtemi arogo tanishirtem, NGOs, Civil Societies aser tanga teloktem dang nungi teyari meshitsüla" ta Minister Pangnyu-i ashi.

"Khristmas matongdangsa vaccine agütsütsü alizüing ayuba atongtsüla. District tem tsüingda khuret balala alitsü saka ajakji külemi koktetsüla. Asenoki alizüing ayuba metongra tarutsü nung Nagaland nung ano lockdown alitsüsa akümtsü" ta paisa metetdaksü.

Senden nung Principal Secretary, Amardeep S. Bhatia IAS-i tesentepertem pelaa

agizüka jembidang nisung ajak dang pei pei tebilemba lemsateptsü ayongzük.

"Asenoki vaccine ajema agiba khuret koktetsü atema lenmangtem bushitsüla aser awareness agiba yutsür tanga mapa inyaktsüla" ta Amardeep-i ashi.

"District ketdangsürtemi telok ajak den amalitepa vaccine agütsüba maparen inyaktsüla. Asenoki door to door campaign nung temolung agütsütsüla aser Medical officers-i nungdakbapur tonga aotsüla" ta paisa ayongzük.

Medical Minister aser Principal Secretary nati mapa agüja senden nung adenba atema pelar ta Principal Director Dr. Neikhrielie Khimiao-i ashi. Külen, State Immunization Officer Dr. Ritu-i Nagaland nung COVID-19 Vaccine indang power point presentation ka sayu.

## Catholic school temi shisaliok tajungba sayur: CS Alam

**Kohima, November 20, 2021 (TYO):** Nagaland nung catholic school temi catholic schools nung shilem tulu agir aser sorkar o nija school aika dang nungi parnok shisaliok tajungba sayur, ta Nagaland Chief Secretary J Alam-i ashi.

Don Bosco Kohima küm 50 ajungba jubilee mong nung jembidang Alam-i "school education tsütsü repringdangra catholic school temi shilem tulu agir" ta ashi.

School tem nung shisaliok tajung sayuba den Don Bosco kibongi meimchir yaritsü atema alima nung reju 3000 tema lapoka lir, ta paisa ashi.

Nagaland nung Don Bosco school troki kakeshir meyrjang aika nung shisaliok angazükdaksür. Nagaland nung school ajak agi 2706 lir aser iba nungi sorkar school 1961 lir aser nija school 745 lir. Sorkar school nung kaketshir lakh 1.66 aser nija school nung lakh 2.78 lir, ta Chief Secretary-i metetdaksü.

Nagaland nung kaketshir 62% tashi nija school tem nung azünger aser item school aika tamangba yimsü dak sendakba teloktemi lapokba lir, ta paisa ashi.

"Shisaliok tajung sayutsüba

kanga tongtipang aser state sorkari sorkar school tem nung shisaliok jenjang tajungba kümdaksütsü atema mapa aika inyakdar" ta J Alam-i ashi.

Mapa tongtipang kaji World Bank-i teyari agüja tesem balala nung Lighthouse schools lapokba lir. Technology tsütsü repringdangra, sorkari e-classrooms aser labs tajung agütsür, ta paisa ashi.

"School dang shisaliok indang tekülem ki ta-a ajar kechiyong school indang mission ji kaketshir shia dak aliba sempet anitetba aser senso tajung ka ka akümtsü atema sayutetsüba lir" ta Chief Secretary Alam-isa metetdaksü.

Don Bosco Kohima ketdangsürtem, tesayurtem aser staff-i küm 50 tashi lanur kaketshir meyrjang aika nem quality education agüja aruba atema pelar, ta paisa ashi.

Hon jubilee amongba ya aseeno ki idak nungi kongi aotsü ta asüba meyipa repringshiba mapang ka lir. Talisa National Education Policy tasen ka mapa küma tenzüka mapang ka nung India nung shisaliok tsütsü temelenshi arutsü, ta Alam-i metetdaksü.

Covid-19 wara ajanga asenok

dang education technology melenshiba sülen anidaktsü tangatetba agütsüogo, ta Chief Secretary-isa ashi.

"Kaketshirtemi tashi angatsüba kanga tongtipang saka kasa mapang angazüksü jangraba aser arokaroka shisadangba tangatetbatem alitsüla, kechiyong ibaji ajanga scientists, innovators, tanishirtem aser temelenshi bener arurtem akümer" ta Chief Secretary Alam-isa kaketshirtem ayongzük.

"Asen lima nung Don Bosco ya shisaliok teju tejentiba rongnung ka lir aser küm 50 tashi nung taküm aika yanglutsüogo" ta golden jubilee organizing committee chairman KD Vizo-ia ashi.

Iba sentong nung Most Rev. Dr. James Thoppil, Bishop of Diocese Kohima, Fr. Dr. Jose Kuruvachira, SDB, Provincial of Salesian Province of Dimapur, Fr. C.P. Mathew, SDB aser Helievi-o Solo, chairman Kohima Village council nungertemia o tatsütsü jemi.

Tanü nikongdang Advisor to Chief Minister Abu Metha-i Bosconian Nite nung tetushi süa jaoker ka ama shilem agia liasü.



## Dimapur nung 'Aerobio' aser Waste Bins lemstsü



Dr. Neikiesalie Kire-i road sweeper vehicles tenzüksüba noksa nung angur.

**Dimapur, Yimpoksüi/ November 20 (TYO):** 'Aerobio' Complete Human Waste Management Solution, Blue & Green Waste Bins lemstsüba aser Road Sweeper Vehicles tenzüksüba sentong ka November 19 nü Aerobio Manufacturing Unit, Thilixu Atosa, Dimapur nung agiogo.

Sentong nung alakteta jaoker Advisor, Municipal Affairs and Urban Development, Dr. Neikiesalie Kire-i, Aerobio jung junga amshiba ajanga lokti nung temelenshi bener arutsü ta ashiba den temelenshi ya ashenokdak nungi tenzüksüba ta ashi. Paisa, iba mapa tajung asoshi Municipal team nem tenüngsang agüja liasü.

Aerobio ya Proprietor, Aerobio Production Unit, Watinuksung Jamir-i sayaa liasü. Pai, Aerobio ya indigenous formulation ka lir, kong novel bacterial consortia densema lir

ta ashi. Aerobio yagai scü kanga kara ajak samaa odaktsür aser iba ajanga teshinem samadaktsür.

Aerobio nung indigenously isolate asüba bacteria keta lir aser temperature aika nung amshiteter aser methane gas matokdaktsür. Aerobio ya environment nung apply asüba mapang biological communities alter masür aser Aerobio ya non-pathogenic lir, ta pai ashi.

Paisa, Aerobio yagi teshinem samadaktsür aser methane gas madokdaktsür. Aerobic yagi Sludge tajemba kümdaktsü. Tatem nung CO2 aser tzu anungdaktsüsü aser tzu ya sub-neutral nungi neutral pH tashi asütsü aser aiben recycle süa amshitetsü. Iba yagi sewage tank mapashia merekteta aliba agintsüsü aser tema nung tzu menenba nungi kümsütsü, ta ashi.

Blue & Green Waste Bins amshiyim dak sendakba nung Jt.

Director, DMA, Temjenrenla Kechü-i o tatsüka jembia. Lai, solid waste management indang jembia kong, biodegradable, recyclable aser inert waste densema lir. Blue bin tem ya jana takok aser green bin tem ya jana tai bendentsüba atema lir. Item bin tem ya kanga junga amshiba ajanga jana agi timtem agütsüba shilem 60 nungi 70 tashi tajungba kümdaktsüsü. Laisa, blue aser green bin shidak amshitsü aser inert waste intokdak shidak anepalutsü ajungshi.

Aerobio aser waste bin tem ya Dimapur District kübok ULB tem ajak nem agütsüogo. Sentong ya Addl. Director & HoD, DMA, A. Chenithung Lotha lenisüba nung agi aser Jt. Director, DMA, Temjenrenla Kechü-i tepela anküp o jembia liasü.

Kasa mapang nung Advisor, Dr. Neikiesalie Kire-isa, road sweeper vehicles tenzükja liasü.

## Dimapur nung awareness campaign ka ayongzuka agi

**Dimapur, Yimpoksüi/ November 20 (TYO):** Food & Civil Supplies department aser Centre for Health Research Innovation (CHRI) aser National Stock Exchange (NSE) foundation longjemer 'AzadiKaAmritMahotsav' nung shilem ka ama November 20 nü fortified rice dak sendakba nung awareness campaign ka ayongzuka agiogo.

Iba sentong nung Advisor, Food and Civil Supplies, Pukhayi Sumi alakteta jaoker liasü. Sentong nung o jembiba mapang pai, iba sentong ya state nung iron deficiency anemia aliba bentetsü atema rice fortification ajungkettsü atema

ayongzük ta ashi. Paisa, fortified rice ya India sorkari inyakyim tongtibang ka ta jangjaogo, koba anemia azioktsü atema tasa ka ama tang POSHAN Abhiyaan aser AnaemiaMukht Bharat amala National Flagship Programme tem nung shilem ka kümogo.

Sentong nungsa Satakshie Sharma, CHRI-i, diet aser overall health nung Rice Fortification koda tongtibang iba indang jembia aser ashiba agi, rice fortification ya nüburtem anema toktsüsü aser nutritional quality ajungkettsü atema tenüngdakbatem temulung dang yur jang nung iron, folic acid ama nutrients tem bendenloktsüba

inyakyim ka lir. Lai, India nung jang ya nüburtem anogoshia chiyongba chiyongtsü ka lir, anungji jang nung micro nutrients tem bendenloktsüba ya nüburtem diet tajungba kümdaktsüsü asoshi tanga lenmang ka lir, ta ashi. Sharma-i, sentepa aliba lokti dang iba janga ya kecha tarendakba makai chiyongtsü ajungshia liasü.

Iba sentong ya Director, Food and Civil supplies lenisüba nung agi. Fortified rice demonstration nung shilem ka ama fortified rice talep aser tanga chiyongtsü taleptem and tanga chiyongtsü taleptem beneficiary tem nem lemja liasü.

## Dimapur nung "Hafele Design Studio" lapokogo



**Dimapur, Yimpoksüi/ November 20 (TYO):** Hafele-a-i Dimapur kübok SBI Regional office opposite nung parnok indang exclusive showroom "Hafele Design Studio" lapokogo. Iba showroom ya Honibarnü Deputy Chief minister Y Patton-i semzükja liasü.

Iba store nung pei kidang amshitsü atema oset tapet shimtsü asoshi tapu balala aika

angutsü, aser iba den hardware & fitting systems aser electronic locking solutions agütsüsü.

Osettem rongnung drawer aser cabinet, storage unit, sorchiok dang amshiba osettem, washing & cleaning units, architectural hardware, furniture fittings, sliding door, lighting, appliance aser sanitary product tem amala product balala angutsü.

National Manager, Hafele, Avinash Pandey-i, parnok nükjidongji customer tem temulung süa anepaluba aser onok tashi den putepa inyakba lokti/kija den mapang talangka inyaktsü atema longjemtsü asoshi lir, ta ashi. Dimapur aser temeket nung aliba customer tem nem kidang amshitsü atema oset tapu balala den service balala agütsüsü onok bendanga agüja lir, ta paisa ashi.

## Hornbill International PhotoFest ayonger

**Kohima, Yimpoksüi/ November 20 (TYO):** Department of Information & Public Relations and Tourism Department, Government of Nagaland den longjemer Eastern Art Council-i Hornbill Festival, 2021 nung shilem ka ama Hornbill International Photo Fest ayongzüksü renema lir.

Iba Photo Fest omenji "Colours of Nagaland" asütsü aser tetokteper ajaki shilem agitettsü.


Tetokteper nung shilem agitsü atema züngoksemtsü asoshi tatembangbuba anogoji November 25 (ayatrem) tashi asütsü. Tetokteper nung shilem agitsüpurtemi timba agi noksa asemsem agütsüsü nungdaker.

Noksatem ya print ser alitsü akok mesera soft copy dang asütsü akok, koba hipfestnagaland@gmail.com dangi mail asütsü. Noksatem

ya color mesera black and white mashi ka agütsütsü. Noksatem ya jenjang tajung asütsüla aser tasazük 8x12 inch dang nungi tajemba masütsüla aser 12x18 inch dang nungi timba masütsüla. Minor digital enhancement-bo melatsü saka border, frame, special filter, text, copyright, watermark mesera signature memelatsü.

Taoba mapang Hipfest nung amshir aliba noksatem iba tetokteperba atema magizüksü saka photographer temibo shilem agitettsü. Photographer tenüng, address aser contact number jangja jangja agütsüsü nungdaker. Noksa ajak nung caption dena alitsüla.

Tapet masüba noksatem agintsü atema tetokteperba ayongertem ket nung tashi lir aser sentong ayongertem noksatem publish/print mesera amshitsü temeden agitsü.



Repalemzung Longkümeri züluba tanabuba nisung taküm otsü kaket (biography) "Khristar Noklenwar Toshimongba (Christ Warrior)" kaket Rev. Dr. L. Anjo Keikungi (former NBCC General Secretary) sayatsüogo. (Abelen nungi achiji) Rev. Dr. L. Anjo Keikung, Toshimongba aser Repalemzung Longkümer)

## Kohima nung World Fisheries Day mungogo

**Dimapur, Yimpoksüi/ November 20 (TYO):** Government Fish Farm, Thizama, Kohima nung November 20 nü World Fisheries Day, 2021 mungogo. Iba sentong nung Advisor, Fisheries & Aquatic Resources, Economics & Statistics, L. Khumo Khiamniungan alakteta jaoker liasü. World Fisheries Day ya kümshia November 21 nü amunger, ajüsüka taküm iba anogo Deobarnü tenchiteper asünung anogo ka jelia mungogo.

Sentong nung Advisor, Khumo Khiamniungan-i, ango tzüba ajanga mapa inyaktsü atema maongka agütsür aser kibong aika atema senotsü aatsü lenmang tajung lir, ta ashi. Paisa, kibong aika iba yagi mesür, ta ashi. Pai ango metsürtem dang sorkar fund tem dak dang memetaloki pei sasa inyakyim balala benoka inyaktsü ajungshi.

Advisor-isa, nüburtem dang ango metsüba ya mapa ka ama agitsü ajungshi, kechiyong iba ajanga maongka aika agütsür, ta ashi. Pai, ango metsürtem dang ango timba aser tajungba metsütsü atema Department ketdangsurtem dang nungi technical tsütsü teyari meshia agitsü aser lokti nung telen balala den sendaktepa inyaksangshitsü ayongzük.

Secretary, Fisheries & Aquatic Resources, Anoop Khinchi, IAS lenisüba nung iba sentong agi, aser pai ango metsüba ya khen atema dang masü saka mapang talangka metsüa aotsü koda tongtibang, iba indang lemsatep. Pai ashiba agi, linük nung nisung million 2.8 fishery aser iba dak sendakba maparentem nung mapa inyaker ta ashi. Khinchi-isa, state nung fishery potential 11½ % dang amshir ta ashi. Pai, anog metsüba ya state nung mapa tali adokdaktsüsü atema maongka

tajung ka asütsü, ta ashiba den ango metsürtem dang Fish Farmers' Organisations tentetsü ayongzük. Khinchi-isa, paddy cum fish culture aser ornamental fishing koda tongtibang, iba indang jembia liasü.

Maneni Director, Fisheries & Aquatic Resources, Kevisa Kense, IAS-i, inland fishing ajungkettsü nungdakba lemsatep, kechiyong iba inyakyim nung lenmang sadema lapoka lir, ta ashi. Pai ashiba agi, Department-i anogtem wazüka ayutsü aser shishilembadaki belener aotsü atema refrigerated van tem agütsüogo. Kense-i, ango metsübatem ya shishilemba dak tonga bener arutsü nungdaker ta ashi, kechiyong state nung angotzüba aika lir. Paisa, anog ya chiyongtsü tajung rongnung ka lir aser agri aser allied departments kübok iba ya sen timba aazükba sector ka lir, ta ashi. Director-i, nüburtem dang mapa balala asoshi sorkar fund tem dak dang metaloker malitsü ajungshi. Maneni pai ango metsürtem dang tzüba mereka ayutsü ayongzük.

Iba sentong nung state kübok district shia nungi ango metsür tajungtiba ka nem Best Fish Farmer Award agüja liasü. Mokochung nungi ango metsür Pangjunglemba-i ango metsüba ajanga tajangzük anguba aser iba ajanga koda par kibong mesür, iba indang lemsatep.

Maneni sentong nung ango metsüba yimya dak sendakba nung tangazükba agüja liasü. SDFO, Rulanthung Ezung-i Fish Farm Management Practices indang aser FI, Tsutsamo Ezung-i Composite Fish Culture indang tangazükba agütsü. Paddy cum fish Culture aser Common Crap Breeding dak sendakba nung tangazükba SDFO, Khriezhatto Nakhro-i agütsü. Iba sülen ango metsürtem den sensaksem mapang agia liasü.



Northeast nung mezüngbuba Orchid centre Mizoram nung lapok



**Aizawl, November 20, 2021 (Agencies):** Northeast nung tang mezüng atema Rs 3.9 crore endoka Mizoram Orchid Centre ta ser Centre ka lapokogo aser iba ya orchids sama aobatem kümzüka ayutsü atema lir.

Iba centre ya Shyama Prasad Mukherjee Rurban Mission (SPMRM) kübok teyari agüja lapok aser tissue culture, greenhouses aser ancillaries atema laboratory tajung ka lir ta Rural Development Department-i metetdaksü.

Aizawl nungi kilometer 41 shi pilar aliba Maubuang nung Mizoram Rural Development

Minister, Lalruatkima-i iba Centre lapoktsüogo.

"Iba centre ajanga samaa aoba orchid tapu balala kümzüka ayutsü aser karbo Mizoram nung dang angur" ta Lalruatkima-i ashi.

Iba centre ajanga eco-tourism aser rural tourism nung lenmang lapoktsür aser iba temeket alirtemi maongka aika angutsü, ta paisa shisem.

"Orchid tsünüba ajanga iba tesem nung rongsenketzüng jenjang renloksü" ta Mizoram MLA aser forestry expert, Professor F. Lalnunmawia-ia ashi.

Iba mapatong ya Rural Development Department

ajanga inyaker aser küm asem atema Zoawi Orchids nem ketdangsüdaktsütsü.

Iba centre yanglutsü atema Sikkim nung aliba National Research Centre for Orchids aser Mizoram University nungi mongintem teyari agia liasü.

Mizoram nung orchid tapu 350 jungnüa lir aser ano maneni tapu tasentem angur. Ajsüaaka, alima renloka aoba mapa inyakba ajanga orchid aika samar.

Ano külen, taoba küm ana tsüingda süngdonglidong miima shibenertemi orchids bendena ayokba ajanga orchid aika sama ao saka Young Mizo Association (YMA) ajanga iba mapa noktangogo

Tripura nung NLFT (BM) züngsem 2 apu

**Agartala, November 20, 2021 (Agencies):** Tripura jangjaogo.

Police-i Dhalai district kübok Tena ket nungi smartphone ana aser Rs 15,000 bena lia apu.

Tripura- (Biswa Mohan) Dhalai district nung tashiyim züngsem ana puogo. agi sen saruba maparen nung Special Branch, tenati shilem agia liasü ta tai Gandacherra police ajanga tonglokja lir.

osang tejangja agütsüba nung Tenati ashiba nung ajemdaker Dangabari nung ajemdaker police-isa NLFT NLFT (BM) züngsema ana ya (BM) indang overground gari ka nung mena lia apu. workers ana apu. Tenaji Bailya Tenaji Sanjoy Tripura (30) Jamatia (28) aser Rabi Kumar (Sapre) aser Akhindra Tripura (45) na ta jangjaogo.

Kiren Rijiju-i Arunachal nung mountain biking ajungketer



**Guwahati, November 20, 2021 (Agencies):** Union law and justice minister Kiren Rijiju-i Arunachal Pradesh kübok Chug Valley nung mountain biking ajungketba mapa inyaker aser pai tourists tem jaokogo.

Union minister Rijiju-i Arunachal Pradesh nung tenemlen bicycle anishiba indang video aser noksatem pa indang Twitter handle nung sayua liasü.

"Arunachal Pradesh kübok Chug Valley nung Mountain Terrain Biking ajanga na kanga pelatsü" ta Rijiju-i ashi.

Arunachal nung Ayurveda College aser hospital tasen lapoktsü

**Guwahati, November 20, 2021 (Agencies):** Union AYUSH minister Sarbananda Sonowal-i Honibarnü Arunachal Pradesh nung AYUSH ajungkettsü atema mapatong aika inyaktsü metetdaksüogo.

Northeast ajungalen AYUSH sector renlokdaksütsü atema inyakba nung iba ya shilem ka lir.

Pasighat nung aliba North Eastern Institute of Ayurveda and Folk Medicine Research (NEIAFMR) nung o jembidang Sonowal-i campus nung infrastructure tasen yanglutsü atema Rs 53.72 crores lezmükba metetdaksü.

Pasighat nung aliba NEIAFMR campus nung

Kaketshir 30 azüngtsü atema Ayurveda College tasen ka aser yipden 60 aliba Ayurveda hospital ka yanglutsü. Iba ajanga mapa talila 86 tasen adoktsü, ta pai ashi.

Tarutsü anogotem academic block, boys' hostel, a girls' hostel aser sports complex yanglutsü ta Sonowal-i ashi.

"Northeast nung sobaliba nungi benshia aruba mozü aika lir saka asenoki wazüka mayur. Iba jagi tang onoki Vedic era nung amshiba mozü wazüka ayutsü meranger. Yangi Ayurveda College tasen ka den hospital ka yanglutsüba osang tajung metetdaksür" ta Union Minister-i metetdaksü.

"Northeast nung Ayurveda college tem tashi itdaksüba

den külemi Regional Raw Drug Repository (RRDR) & Museum, Sophisticated Analytical Instrument Facility (SAIF), State of Art Panchakarma Treatment & Research Centre, aser Paramedical Teaching Centre amala lapoktsü tebilemba lir" ta paisa ashi.

North Eastern Institute of Folk Medicine (NEIFM), Pasighat dang North Eastern Institute of Ayurveda & Folk Medicine Research ta tenüng melenogo aser iba ya Ministry of AYUSH kübok autonomous National Institute ka lir.

February 21, 2008 nü Union Cabinet-i ali acre 40 shi ka nung iba reju lapoktsü molunga agizüka liasü.

Arunachal nung airgun 2000 tema agütsüogo

**Guwahati, November 20, 2021 (Agencies):** Arunachal Pradesh nung nisungtemi airguns 2,000 tema aser rifle kar agütsüogo aser parnoki ozü aser shiruru shikari masütsü nangzükogo, ta Environment and Forest Minister Mama Natung-i metetdaksü.

Arunachal Pradesh nung lokti shikariba ya küm noklang aika inyaka aruba mapa ka lir ta Minister Natung-i ashi.

"Onoki ozüng yanglua tashiyim agi mebenok. Ajsüaaka, onoki awareness dang agi aser nisungtem dang pei sasa molungteta

prangpong aser airgun agütsütsü ayongzük" ta pai metetdaksü.

"Tang tashi nung airgun 2,000 tema aser rifle kar agütsüogo. Iba ya campaign nung asoshi takok tulu anguba lir. Iba campaign ya Arunachal Pradesh nung dang masü saka linük ajungalen agitsüla" Minister Natung-i Silchar nung sentong ka nung jembidang ashi.

Iba sentong nung Assam Forest Minister Parimal Suklabaidya-ia state sorkar dang wildlife sanctuary tasen ka kümteetsü atema ashitsü ta metetdaksü.

Assam kübok Barak Valley ta ajaba tesem nung wildlife sanctuary ji 320 sq km nung lapoktsü ta paisa ashi.

Tawa tu Assam sorkari Dihing-Patkai (eastern Assam) ya national park ka ta sangoktsüogo aser iba ajanga state sorkari alima kümzüka ayutsü atema inyakba sayur.

"Barak Valley nung ozü tapu 550 aser shiruru 100 shi lir anungji Cachar, Karimganj aser Hailakhandi district tem adenba Barak Valley nung arem shiruru wazüka ayutsü" ta Lok Sabha MP Rajdeep Roy-ia metetdaksü.

**DEBTS RECOVERY TRIBUNAL, GUWAHATI**  
 Government of India, Ministry of Finance  
 Department of Financial Services (Banking Division)  
 Suwarna Bhawan, House No. 12, New Town Path,  
 G.S. Road, Ulubari, Guwahati- 781007

**NOTICE OF DEMAND TO THE CERTIFICATE DEBTOR(S)**  
 (See Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961)

**D.R.P.C. No. 37 / 2020**  
**Bank of Baroda, Dimapur Branch -Vs- KUGHAZHE CHISHI & Ors.**

To,  
 1. **KUGHAZHE CHISHI,**  
 S/o Sukhei Chishi, House No. 24, Vihuto Village, Dimapur, NAGALAND-797112.  
 2. **SUKHEI CHISHI,**  
 Son of Late Khukui Chishi, House No. 24, Vihuto Village, Dimapur, NAGALAND-797112.

This is to certify that a sum of **Rs. 30,07,824.47 (Rupees Thirty Lakhs Seven Thousand Eight Hundred Twenty Four and Paise Forty Seven only)** as per details given below has become due from you consequent to a Recovery Certificate issued by the Ld. Presiding Officer by an order dated 26-11-2020 in case No. O.A. 473/2019.

|  |                         |
|--|-------------------------|
| (1) Amount due as per the Recovery Certificate:          | Rs. 24,12,633.00        |
| (2) Interest from 01.10.2019 to 28.06.2021 @ 12.25% P.A. | Rs. 5,14,981.47         |
| (3) Costs  | Rs. 80,210.00           |
| <b>TOTAL</b>   | <b>Rs. 30,07,824.47</b> |

2. You are hereby directed to pay the above sum within 15 days from the Publication of this notice, failing which the recovery shall be made in accordance with the provisions of Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961.

3. In additions to the sums aforesaid, you will be also liable for  
 (a) such interest as is payable in accordance with the recovery certificate D.R.P.C. No. 37 / 2020 for the period commencing immediately after issue of recovery certificate to the date of realization, and  
 (b) all costs, charges and expenses incurred in respect of the services of notices and of warrants and other processes and proceedings taken for realization of the dues.

**GIVEN UNDER MY HAND AND SEAL ON 10<sup>TH</sup> DAY OF NOVEMBER, 2021.**  
 (S. KUMAR)  
**RECOVERY OFFICER**





## TIR YIMYIM YIMOBILEM (EDITORIAL)

DIMAPUR AMUNGNÜ, YIMPOKSÜI (NOVEMBER) 21, 2021

### Mapa tasaktiba meshiba

**M**osa leniba kübok Egypt nungi Kanan atongtsü atema jajar nokinketerem rongnung ajak dang tasü taitba aser tamang tulutibaji Kaleb liasü ta asenoki parnok Kanan lima matong küm 40 jajaba otsütem azüngdang metetter. Item otsütem rongnung tongtibang kaji, Israel nungertem Kanan lima atongtsü anasa Paren arem nung anena alidang, kenü anogo Kibubai Mosa dang Israel nungertem alitsü asoshi agüja aliba Kanan lima ladangtsü asoshi kidong shia nungi nisung kaka yoktsü ashiba ama shimtetdang, Ebraim kidong nungi Nun jabaso Hoshea(Yihusua) aser Yihuda kidong nungi Jefunne jabao Kaleb shimtetba Züngdangba tapu 13 nung shia angur. Item itangitertemji Kanan lima ladangba nungi meyipa alidang, Kanan lima nung parnoki anguba temoatsütem ajak toktsür, Hebron nung alir aso tulu kin Anak chirtem tashi uluba indang tetsübuttsü osangang bener arua Mosa aser Aron na den Paran arem nung anenzüka alir Israel nung yimkong dang ashiba asenoki kasa Laishiba tapu nungji angur. Iba tetsübuttsü osangji angashir, Israel nung ajak tetsübu nung ola adoka ajep aser joko Mosa aser Aron anema nemnem aser Egypt-iang meyipa aotsü jemi tenzükba asenoki Züngdangba tapu 14 nung angur. Kanan limaji Tsüngremi Israel nung nem agüja lir saka tangbo ibaji aso tulu Anak chirtem ket nung lir, anungji itemji makdoker külenang Kanan limaji agitsüla. Atangji, Kanan lima ladanger arur Israel nungertem jagia Kanan limaji mamatzü aser ninang mojitsü agi sünga lir, tsükmenatsü tejep ka agi nisung ana amena atanger ta osang tajunga bener aru. Ajisüaka, parnok asoshi osang tamajungji iba limaji parnoki agidi süra yangji alir aso tulutemji makdoktsüla. Tsüngremi Israel nungertem nem Kanan agütsüba ya ayongayonga angati sempet ka agütsür ama magütsü, saka parnok tamang agi tsükchirtem alidak long jara aser mitsa nungpoka oagi rarar külenang agitsüba tenangzükba lima ka liasü. Ashiko, Israel nungertem rongnung Mosa aser Aron den Yihusua aser Kaleb na mali asübo, Israel nungertem tsükchir tsübuba agi Kanan lima metongtet, Paran arem nung jagi meyiper lila. Joko, Kanan lima alir tsükchirtemji makoktsüba osang bener aru tashi nung Mosa aser Aron nata ola maka aküm. Ibai Israel nungertem Egypt lima nungi Kanan atongtsüba lenmang nung atalokba tatalokbatem rongnung kanga dang tongtibang telemtetba agidak lenjem ka liasü. Idangji, Yihusua aser Kaleb nati tula shisa aser Israel nungertem dang, Anakim nungertemji tetsübu asenoki parnokji akoktsü ta ashidang, Tsüngremi parnok rongnung mapa inyakba asenoki kasa Laishiba tapu nungji angur. Iba anogo nung Yihusua aser Kaleb nati ashiba tamang aser tasü tait o jagi Israel nungertem Kanan lima tongtet. Kanan lima tonger, joko Israel nungertem tebu taren shia ali alemtsü tenzükdang, ashiko ajaki lendenlen aser tsükchir tesashi malidak tesemtemang lemzükna bilemer asütsü. Asenokia yamaji bilemetsü. Ajisüaka, shingai melemzüksü dang, Kalebi pai tama orr Yihusua dang, Israel nungertem yimkongi tsübuba aser maginüba aso tulu Anak chirtem alidak Hebron tenem meshiba otsü Yihusua 14 nung angur. Küm 40 jakdang Paren arem nung pai koda tasü itta Mosa aser Aron tsüngdang jemi, kasa tasü tait tamang agi pai Anakim nungertem aso tulutemji akoktsü ta Yihusua dang ashiba asenoki angur. Ajisüaka, Kalebi Tsüngremi Kanan lima ajungaji parnok nem agütsüogo ta amang, anungji Anak nungertem aso tulutemji senzüa angur dang ashi, parnok dak tongpang nokdaksüba tashi agienogo ta pai angateta liasü. Kaleb taküm nung jangratemtsüji pai inyakba mapa nung pai Tsüngrem ain aser tashiji metetnü. Moudang nung mesüra meinyakdang nung, kodaser kong Tsüngremi asenok ajanga mapa inyaksü (?) ta asüba tangatetbaji Kaleb dak liasü. Mapa tasak aser tsükchir tesashi alidakji dang Tsüngremi tenangzükba senmanga tuluba yuja lir ta pai amang. Iba amaji asenoka asen taküm nung tezübaba lenmang aser ayongayonga alitsüba tia dang shimtetra, asenoki kodanga Tsüngrem ain aser tashi indang memetetsü aser majangshitsü. Kaleb ama, asen mapa ajanga Tsüngrem tashi aser ain metettsüba, asenokia tangari makoktsü ta bilemba mapa tasak inyaktetsüba Tsüngrem dak amangdi.

## OLEMSABANG

### AROGO NUNG TETSÜRA DEACON BOARD NUNG SHIMA INYAKDAKTSÜTSÜLA

~ Esther (Khar)

Atangji arogo ya tamang aser telongjem ka ser tanela khuret bona yindaktsüdi süra, o lemtepdak aser telemtetba agidak, deacon board meeting nung senior pastor den associate pastors, youth, music aser Christian education director ajak adentsüla. Iba team work jisa tajungba asütsü. Ano ni angatetba kaji, deacon board nung tebur dang asütsüla mesüra tetsürtema adentsüla ta jembiba ya santem asoshi tanela khuret bona inyaksü atema masü power aser social status aginür amai bilemer. Atangji angati nübo agüja deacon inyakbaji tenla tulu asütsü, saka deaconba mesüra deaconlaji shinga kidangia sarasademia maor aser shingai sarasademi majar ta asüba nisung ka süra koda ta bilemer? Santem taküm aser kibong jenjang memetet aser mangu ser arogoi inyaka aotsüba telemtetba agitsüba koda? Khen khen tesem kar nungbo, pastor aser deacontem pei arogo nungertem asüba funeral agitsüba ki memetet bushia senzüba osanga angashir. Iba funeral nung kechi jembitsü?

- K. Temjen Jamir

Arogo anitsü asoshi fulltime contribution kangasa tongtibang aser iba temoatsüji arogoi magiteter magiteter. Anungji Board of Deacon nung fulltime ta tenung ja itasen agüja ayurtembosa anioka arogo mapa aser khuret ajak yaritepa bener ao tajungba agütsü - Lanükümzük

Tetsür nem, parnok temeden agütsütsü asoshi jembidang, temeden magütsüdang yongi tetsükdaksütem jembibaji, asenok ano old mindset nung aliba sayur. - Imli P. Lemtur

BCM ya ola aser tenung tuluba saka tagitsü aser tamshitsü tilaba ta nibo bilemer. BCM ya okila/ introduction dang ashi Structure aser functions tejangja makaba document ka ta nibo angur. BCM ya amshitsüba ta süra, drastic revision ka nungdak. - Tiatoshi Longkumer

Mapang aser tensa den apet asenoki otsü-olem balala jembir. Aluchidang iba otsüji jembir, aser alurudanga iba otsü jembiba mesüka YSS sabang nung tanü nübur asoshi tang tang nungdakba onüktem benoka lenir, Tsüngremi, aser tashitemeteter aikati shilem tajung agia arogo nung tetsürtema Deacon menden nung anioka inyakdaksütsü nungdaker ta shisalen aika agüja lemsatapa liasü.

Baptist Arogo nung Deacon ta asüba ya kanga dang tongtibang Menden mesüra Board ka lir, kechiaser asenok ajaki metet Deacon meteni Arogo yimsütsüba lir medema bener aotsü makok, kechiaser Baptist Arogo ka nungji ajak dang tematiba tekolak committee-ji Deacon Board (Tenzüker Menden) ya lir, iba Deacon Board ajanga Baptist Arogo ka nung tenüktelen teinyaksü sentongtem ajak telemtetba agia Arogoi inyakyima bener aor.

Ajangla adianutem ni shinüba kichi? Kodang nenoki külemtsü asoshi senteper, nenok nisung shia tenütsang ken ka, tesayuba ka, jungkai atokba Arogo yangertsü asoshi lidakjang. 1 Korint 14:26.

#### Arogo Deacon ayuba tangatetba

Town arogo tulu tashi nung deacon board nung ministry /department pastortem metendaktsüba yabo kangasa nemjema bilemer, aser tadener pastortem jagi danga jembitsüba sur nung ta sa mangmanga bilemer. - Tiatoshi Longkumer

Deacon Board ya akhi mapangbo tebur dang shima tenzüka aru, aser yangji parnoki kechi lemtepdak yangji dang Arogoi ajak anitaka inyakyima aru aser aji oda tetsürbo iba Deacon Menden nungji meshim mesüra magi, kechiaser tetsür Deacon shimra yangji tetsükdaksü aika lir ta bilema aser aija tetsürbo maangka magütsü odang toktsü, aser iba tangatetbaji dang nüburtemi shitak asütsü südi ta bilemloka yangji dang tangatetbaji anenatokba angur. Tetsür Deacon nung magiteta kuli agütsübatemji kar yamai lir:

- 1) Tetsür Deacon nung shimra aini aodang timtemer, tat agi. La Arogo nungdak aini aotsüba kümra, La den ano tebur kabosa anitaksüba akümer, Arogo Expenditure tali.
- 2) Deacon Mendenji yimsütsüba Menden, anungji Aor yimli nung tetsüri yimsütsüba maru.
- 3) Tetsür Deacon nung shima temeshi mapa, tat. agi, Kibuba Benjung amala angandang laji ita shilem aoba mapang tenjira aji kanga dang timtem tulu.
- 4) Tetsürtema women ministry nung peria kar, anungji pei ministry nung dang rangloka temulung agüjang.
- 5) Ano Arogo kar nungbo Arogoi maangka agütsür saka tetsürtemi tasü maiter.

Ano talila bilemlokbaji tetsür Deacon shimra parnoki amokbangtsü tsübur, ano kari bilembaji tetsür aitra iba Deacon Board Menden tali benjatsütsü ta bilemer. Item mesükba kulitem bener Arogo aika nung tetsürtem nem tim shilem magütsü arubatem lir.

Protestant telok tamendakdak rongnung tongdi kaji "Priesthood of all believers" ya lir. Tanü Protestant Arogoi ibai mangateti "all" ji inyakyim nung "teburtem ajak" ta dang angateter. Tetsür ordain asütsü masütsü? Dikon inyaksü temsü metemtsü? a.a., ajakji iba doctrine ya angatetra aser ibai shitak beshitsü ta teburtemi mulungtetra kecha o makatsü südi. - Menjiwabong Jamir

Tetsürtem putusa putu kidang nungi tenzüka lokti ajak nung mokorai liang, nenok tetsür tanur ta shia anitetba tashitak agi kangshir, anungji item talenpangba nungi atoktetsü asoshi maneni kati ka nem shisatsü agütsüteptsüla aser ajungshiteptsüla.

Yanglushidi süra aser Tsüngremi wadang nung shima shima odi süra taka tait, sati kuli tajung akar, moko sali machir, yi majemer, nüktapangdaa mesenzürtem, lokti nung jembishinü tajung yamala mesükba sempet ajak tapetji tetsür nungia lirko. Hai! Ao arogoi, kati ka tashi mait bushitepa tenzüktepra aseni aniba Khristar arogoi tejakleni odima? Ne lenisüba mapang telemsa Arogo ka masü, longjemer Khristar arogo tejakleni odaktsütsü merangangma, nai tangar dak tashi mait ajitetba amaji ne daka tangari tashi mait ngudarko, telongjem Arogo sudaktsütsü merangdi arungma.

#### Tanü tendak Arogo tangatetba

BCMji senpong kisung centralised asütsü ta angatetba Arogo kar lir. Senpongbo ka aküm saka Ministrybo ka maküm. Eg. Deacon Board/Board of Deacon inyakyimbo BCM maküm. Ano akhi ama dang lir. - Imli P. Lemtur

BCM inyakyimji pastorbai anir nüburtemi angateta inyakra onsara tajung. Iba nung discrimination kecha maliitsü. Asso. Pastor Women kati yamai ashi "Ozü Arogo Pastorbaji station nung liaka, funeral service agitsü maangka kü nem agütsür. Ano aener arudanga deacontem liaka Arogo tenung nung sentep kidang welcome asütsüja kü nem maangka agütsür. Iba amala tangatetba tajung lenir nungdaker. - Tiarenla Longkumer

Deacon board nungja ya melentsüla. Arogo nung deacontem board ta tenung amshi tashi, pastortemji second class decision maker dang board nungji asütsü. Deacon board nungja ya ABAMI amshir küm ishika dang. Yimtsung arogo aika nung ano "Tenzüker menden" etc ta dang tenung amshir. Fulltime ministerial staffs aser deacona ta külemi longjemtetba tenung ka amshitsüla. - Tiatoshi Longkumer

Akhi tsüraburi asen limai Khrista yimsü arur külen ya joko Arok khu lir anungji aroki yaritepa bener odi ta asüba nungi Arogo ta jateter beshia arur, yamaji iba Arogo ya Arok khuret asünung külemi khuret lemsatapa abentsü asoshi tanü tendak joko Deacon ya tebur dang masü tetsür dena shimtsü/ agitsü junger ta nüburtem aser amangbapurtemi tangatetba kati arudaki, aser tetsür adenbaji dang lemang aisü nung ajanzükter ta Sannüker aikati kuli agütsür. Anungji Tanü tensa nungbo tebur dang masü saka temsüa dang lira tetsüra dena shimoka inyakyima aotsü junger ta jembiaa Arogo kar nungbo joko shimoka beshia arubatem angur.

(Maneni asung adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



## Iraq nung kiralongrartemi raksatsüba Tenla kitem yanglushiogo



Iraq kübok Mosul yimti nung aliba St. George Tenla ki tanaben yanglushiba sülen November 18, 2021 nü tangokba noksa nung angur.

**November 20, 2021:** Küm ishika tejaklen Iraq nung Jihadist kiralongrartemi raksatsüba Tenla ki ana yanglushiba sülen Hokolbarnü (November 19) tang mezüing Mosul yimti nung aliba Saint George Tenla kidang tekülem sentong agiogo.

Tamalen Mosul yimti nung Islamic State group (IS) kiralongrartemi Tenla ki ana raksatsüba sülen item Tenla ki küm trok tashi yanglushia liasü. Mosul yimti ya akhidang Khristan mezüingpurtem aliba yimti ka lir.

2014 nungi 2017 küm tashi IS kiralongrartemi yimsüsüba mapang nung Mosul yimti nung teraksaba jenti liasü, ajisüaka tesülen US-i nungita Iraqi sepaitemi kiralongrartem den raraba sülen IS makdoka liasü.

Kiralongrartem merenba mapang nung arrshi küm 53, Maan Bassem Ajaj-a Arbil yimtii jena oa liasü. Pai ashiba agi, "Iba Tenla kidang tatalokba aika onoki menungraab bilemteter."

"Ozü jabaso aser jala nabo iba Arogo nung Baptia liasü. Hokolbarnüa shia Khristan kibongtem yangi adenshia tekülem agia liasü," ta paisa ashi.

US Department of State-i senotsü agi yaria Tenla ki yanglushiba project tenzük aser

Khristan melungtet telok-L'Oeuvre d'Orient-ia iba project atema senotsü tenla agütsüogo.

2014 küm IS kiralongrartemi Mosul yimti agiba sülen kiralongrartemi iba Tenla ki shilem 70 shi raksatsü, saka küm trok agia iba Tenla ki yanglushiogo.

Küm asem tsüingda IS kiralongrartemi nisung jenti tepsetba mapang nung Khristan nütsüing meyirjang aika Nineveh province-i jena oadok.

2003 küm US-i Iraq yimsüsü Saddam Hussien yimsüsüba menden matsüingdokdangbo Iraq nung Khristan nütsüing million 1.5 dak tema liasü saka tangbo iba linük nung Khristan nütsüing 400,000 shi dang kümogo.

Taküm March ita nung Pope Francis-i Iraq semdangba mapang pai Tenla ki ka kima sarasadema liasü. Nineveh nung IS-i raksatsüba Tenla ki 14 rongnung iba Tenla kiji densema lir.

Item Tenla kitem tanaben yanglushiogo, saka ano mapa kar metembang.

Pope-i Iraq semdangba mapang nung pai Iraq sorkar ketdangsertem aser nüburtedang, linük nung tesünep aser terenlok alitsü atema senso ajak kasa züingshitsu, aser yimchi-yimjung ajungkettsüsü atema

maneni inyaktstila, ta ayongzüka liasü.

March 5, 2021 nü Iraq Tir, Barham Salih den sorkar ketdangsertem aser Iraq nung inyaker linük balala nungi ketdangsertem den jembidang Pope-i, "Adianu ama tesünep nung alitsü atema ken o jembitsu, judiciary-i ibaji kümzüksüla aser ozüing akhümtsübutsu, ta ayongzüka.

Secular lenirtem den jembidang Pope Francis-i linük nung Khristantem reshikangshiba indang süoka jemi aser Khristantem temeden atema inyaktüsü mepishia linük tanaben asentenshia yangerba nung Khristantemi pei dak aketba sempet amshitsu, ta ashi.

"Tang tashi Tenla ki jara nokdaka lir saka tashi mait, anungji tashi aittsü atema yanglushitsu nungdak," ta putir kati metetdaksü.

Chaldean nung tongti putir, Thabet Habib-i, iba Tenla ki tanaben tepor ajungtsü atema ano teinyaktüsü mapa kar anünga lir, ta metetdaksü.

Taoba ita Mosul nung aliba Al-Nuri mosque nung Muslim nungertemi ainkar Mohammed asoba anogomong monga liasü. Iba mosque-a ISIS kiralongrartemi raksaja liasü, saka tanaben yanglushiogo.

## Religious Freedom anema inyakba linüktem rongnung Russia züingokogo

**November 20, 2021:** U.S. State Department-i alima nung religious freedom anema inyakba linüktem rongnung Russia-a züingokogo.

Countries of Particular Concern (CPC) linüktem list nung Myanmar (Burma), China, Eritrea, Iran, North Korea, Pakistan, Saudi Arabia, Tajikistan aser Turkmenistan linüktem densema lir.

Iba list nung yaküm Nigeria-a liasü saka takumbo iba list nung Nigeria mali.

Russia aser Algeria na second-tier "special watch list"

nung lir. 2020 küm second-tier list nung Comoros, Cuba aser Nicaragua linüktem liasü.

US Secretary of State, Antony J. Blinken-i sangdong ka ajanga, "Alima tesem balala nung sorkartemi maneni tamangba yimsü nung ajemdaker nüburtedamokmerener, apur aser tepseter. Iba administration-i nisung ajak religious freedom kümzüka ayutsü atema inyaktüsü, ozüing alema inyaktertem anema nokdaksü aser meimchir temeden alema inyaktertem anema inyaktüsü," ta metetdaksü.

November ita tetenzüklen U.S. Commission on International Religious Freedom-i US State Department dang Russia, Syria, India aser Vietnam linüktem CPC list nung züingokang, ta mepishia liasü.

Blinken-isa, "entities of particular concern" nung maneni al-Shabab; Boko Haram; Hayat Tahrir al-Sham; Houthis; Islamic State group, ISIS-Greater Sahara; ISIS-West Africa; Jamaat Nasr al-Islam wal Muslimin aser Taliban densema lir, ta metetdaksü.

November ita tetenzüklen U.S. Commission on International Religious Freedom-i US State Department dang Russia, Syria, India aser Vietnam linüktem CPC list nung züingokang, ta mepishia liasü.

## ANO GO ABEN TSÜNGREM DEN

## TIMTEM AGIZÜKTETANG

*Saka asenoki timtem tekangshi nunga pelatepdi, kechiaser timtem tekangshi nungi taremsük adoker, aser taremsük nungi tasü tait adoker.*

~Rom 5:3.

Jentipuri timtem tekangshi marudaktsüner aser maginer, teti asenoki itemji asenok dangi marutsü mesüra agintsütsü sarasademer. Saka tenyar Pauli timtem tekangshi aremba dang masü saka paibo item nunga pela-a liasü. Rom 5:3 nung Pauli koba 'timtem tekangshi' oren indang jembir ibai aluyimertemi tsük asenba mesüra tsük menüingba koba ajanga tsük aser tsüksü piladaktsür iba nungi medemdanga jembiba liasü. Jang agiteta chiyungtsü atema koda tsükji menüingtsüla aser asentsüla, mesüra olive totzü agizükba nung olive jang taküp shitoka menüingsar, mesüra tsükmenatsü yi yanglutsü atema koda tsükmenatsü menüingsar, yamaji Khristan taküm ka timtem tekangshi kar ajanga menüingsa dang langka tajung aser tajangzük adoker. Iba miim sentongji Paul takümi memet nung pai timtem tekangshi nung pela-a liasü.

Asenoki aginüang taginü timtem tekangshi tamanger shia dak yimya balala agi semdangtsü. Laishibai ashir, "Alima nung nenok timtem kar; saka tasü itdang ni alima kokogo." (Yohan 16:33)

## SARASADEM

Temeim Yisu timtem tekangshi angatetsü ni ne den jajadi. Na medeni ni iba lima nung timtem tekangshi mangatetsü. Amen.

## MP kübok district ka nung Khristantem adenshiba nokdangter

**Yimpoksüi/November 20, 2021:** India nung Madhya Pradesh state kübok Jhabua district nung ketdangsertemi Khristantem tekülem agitsü atema adenshiba nokdangter, ta International Christian Concern (ICC)-i metetdaksü.

VHP densema Hindu nationalist telok balalai mepishiba nung ajemdaker district ketdangsertemi Khristantem adenshiba nokdangtsü atema tetuyuba ka agütsü.

Iba tetuyuba kübok Jhabua district nung taoba Amongnü (November 14) house churches 50 nung Khristantem tekülem sentong agitsü memela.

District nung aliba Khristantemi, joko Khristantemi linük temzüing kübok agüja aliba temeden mebenshitetsü, ta nemjema metetdaksü.

International Christian Concern (ICC) den jembidang pastor kati, "Taoba Hokolbarnü ketdangsertem tetuyubaji ni züingdangter, anungji Amongnü tekülem sentong nung adentsü atema maotsü ni lemteta liasü. Tesüiba ita pongu tashi onoki timtem ajangshia aruogo. House church nung onok züingsem 40 aliba nungi tangbo züingsem 15 dang kümogo, aser tangbo

züingsem 15-ia tsübur," ta metetdaksü.

"Pastor ka ama ni taküm nung timtem ajangshitsu aser kü yimsü atema ni reshikangshia ajurutsü, ta ni meteta lir, ajisüaka tang Khristan yimsü agizüknerter aser onok den tang mezüing tekülem nung shilem agirtem atema ni shisabulur," ta pai metetdaksü.

November 11 nü Sub-Divisional Officer-i Jhabua kübok Thandla aser Megnagar blocks nung aliba police station ajak nung tetuyuba ka agüja magistrate dang nungi temelaba magii Khristantem adenshia tekülem sentong agiba nokdangtsüla, ta tuyua liasü.

Iba tetuyubaji social media nunga prokshiba sülen house churches aser Khristantemi tekülem sentongtem thinena liasü.

Jhabua District nung Khristantemi ashiba agi, Hindu nationalist teloktemi mepishiba nung ajemdaker sorkar ketdangsertemi Khristantem anema inyaker.

Pastor aser Khristan lenir 300 dak temai ketdangsertem ajurua temepishiba shidi ka agüja district nung tamangba yimsü balala amanger ajak kasa züingshitsu, ta mepishio.



**OLONG PAITEP # 6003**

|    |   |  |   |  |   |  |    |    |   |
|----|---|--|---|--|---|--|----|----|---|
|    | 1 |  | 2 |  |   |  |    |    | 3 |
|    |   |  |   |  |   |  |    |    |   |
| 4  |   |  |   |  | 5 |  | 6  |    |   |
|    |   |  |   |  |   |  |    |    |   |
| 7  |   |  |   |  |   |  |    |    |   |
|    |   |  | 8 |  |   |  |    |    | 9 |
| 10 |   |  |   |  |   |  |    | 11 |   |
|    |   |  |   |  |   |  | 12 |    |   |
|    |   |  |   |  |   |  |    |    |   |
| 13 |   |  |   |  |   |  | 14 |    |   |
|    |   |  |   |  |   |  |    |    |   |
| 15 |   |  |   |  |   |  |    |    |   |

|                         |      |                                 |     |
|-------------------------|------|---------------------------------|-----|
| <b>TIPIEN</b>           |      | <b>LANGTSÜNGLEN</b>             |     |
| 1. Taochi sayuba        | - 10 | 1. Menungra                     | - 6 |
| 4. Temezüng agi kongshi | - 4  | 2. Mi tsükloker mesepba         | - 4 |
| 5. Ainer                | - 6  | 3. Süngeo o tzü ajemba          | - 5 |
| 7. Chiyungnü            | - 3  | 5. Temenemtsü tajung            | - 7 |
| 8. Mi nung atsük        | - 5  | 6. Idak                         | - 4 |
| 11. Asen masü           | - 3  | 8. _____ ok                     | - 4 |
| 13. Lenmang ajurutepdak | - 6  | 9. Tebangi apuba kongki tapu ka | - 6 |
| 14. Yangi masü          | - 4  | 10. Tashi endokba metet         | - 5 |
| 15. _____ jang          | - 6  | 12. Tzü manung senzüba          | - 4 |

**OLONG PAITEP # 6002 TELANGZÜBA**

|                                  |  |
|----------------------------------|--|
| <b>TIPIEN :</b>                  | <b>LANGTSÜNGLEN :</b>                    |
| 1. Rebeka, 4. Adam, 6. Yohan,    | 2. Kan, 3. IM, 5. Anüng, 7. Amsü,        |
| 9. Zü, 12. Sayutsüngir, 15. Ku,  | 8. Yosep, 10. Sara, 11. Isak, 13. Yakob, |
| 16. Naman, 17. Abel, 18. Samuel. | 14. Nana, 16. Noa, 17. Am.               |

**KOMA SÜLA TELANGZÜBA**

Q. Nagaland government-i bilemba ama, Nagaland nung Municipal aser Town Council-tem ya election magii dang tentet nunga koma süla ?

Nagaland govt te bilemba ama Municipal ases Town Council election magii shima nübertemi yongyaba ama yakta kümteta **DEVELOPMENT MAPA TENZÜKA** inyak nung kanga tajungba süla.

- SMS

Nagaland sorkari yakta member tem shimer kara mapa tenzük tajungba. CM-i ashiba ama Naga nunger development sen aika akoksar.

-SMS

Tetenzük nungbo yamaji election magii shimbajisa tajungba asütsü, saka tim mesüi shimra mangatetep adoktsü ana nung dang lir.

- WhatsApp

Nagaland government-i bilemba ama, Nagaland nung Municipal aser Town Council-tem ya election magii dang tentet nunga kanga tajungba asütsü.

- WhatsApp

**TANÜBO NAI LANGZÜANG**

Q. Tawa Indian Ocean Rim Association (IORA) indang Annual Council of Ministers senden koba yimti nung amen?

- [A] New Delhi [B] Dhaka [C] Colombo [D] Male


=====(Taruba adok nung onoki langzüksü)

**YASHI ADOK TELANGZÜBA: ASEAN**

**AO OSHI ANGAZÜKDAK:**  
**TANÜ ANGAZÜKTSÜBA OJANG**


**Lepsem**  
 (v) talila alep ( cut extra)  
 \* Lanurtemi arem nung süng tila den tulu kar **lepsem**.

**Lepset**  
 (v) nok agi südaktsü. ( kill by dao)  
 \* Yimertemi yashi jang ka **lepset**.



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Tepela Tasoba Anogo**



1. Tenüng : .....  
 2. Tasoba anogo : .....  
 3. Küm : ..... 4. Class : .....  
 5. School : .....  
 6. Talidak : .....  
 7. Salem osang : .....

**NAI-A YA METETTER MA**

INDIA NUNG NÜBURTEMI SAPUA ALIBA TWO WHEELER KAR: OCTOBER 2021'

1. Hero Splendor 2,67,821
2. Honda Activa 1,96,699
3. Hero HF Deluxe 1,64,311
4. Honda CB Shine 1,13,554
5. Bajaj Pulsar 86,500
6. Bajaj Platina 84,109
7. TVS Jupiter 72,161
8. TVS XL100 55,356
9. Suzuki Access 46,450
10. TVS Apache 39,799



**SUDOKU # 6044 TELANGZUBA # 6043**

|   |   |   |   |   |   |   |   |   |   |   |   |   |   |   |   |   |   |
|---|---|---|---|---|---|---|---|---|---|---|---|---|---|---|---|---|---|
| 2 | 6 | 5 | 1 |   | 8 | 9 | 3 |   | 1 | 6 | 3 | 9 | 8 | 5 | 4 | 7 | 2 |
| 7 |   | 9 | 5 | 6 | 3 |   |   |   | 4 | 9 | 8 | 2 | 6 | 7 | 3 | 1 | 5 |
|   |   |   | 9 | 7 |   |   |   |   | 5 | 2 | 7 | 1 | 3 | 4 | 9 | 6 | 8 |
| 1 | 9 | 3 |   |   |   | 8 |   | 2 | 3 | 5 | 4 | 8 | 1 | 6 | 7 | 2 | 9 |
|   |   |   | 8 |   | 6 | 3 |   | 1 | 8 | 1 | 2 | 7 | 5 | 9 | 6 | 4 | 3 |
| 8 | 2 |   |   |   |   | 7 | 4 | 5 | 6 | 7 | 9 | 3 | 4 | 2 | 8 | 5 | 1 |
| 4 | 3 |   |   |   | 9 |   | 8 |   | 2 | 3 | 6 | 5 | 7 | 8 | 1 | 9 | 4 |
| 6 | 5 |   |   |   | 4 |   | 7 | 9 | 9 | 4 | 1 | 6 | 2 | 3 | 5 | 8 | 7 |
|   | 7 |   | 6 | 8 |   |   |   |   | 7 | 8 | 5 | 4 | 9 | 1 | 2 | 3 | 6 |

**OJANG LUTEP # 5600**

- MPSEET :
- ANGJUBA :
- SÜKING :
- SMAÜ :
- KASA :
- KLJAA :
- NDE :
- SAALUJEMTÜ :
- NGKAA :
- DAKENÜNGR :

**OJANG LUTEP TELANGZÜBA # 5589**

ASÜKÜM SHISATSÜ AJANGA LENDONG BENER ARUR SAKA AJEMALURI ALIMA SÜNGJEMDAKTSÜR

**TAN HOPTA ATEMA - KOMA SÜLA ?**

Q. Asen lima nung 'Clean Election' indang ya kenyongi mejembi aser meinyak nunga koma süla ?





November 20, 2021 nü Raj Bhavan, Lucknow nung Ato kilonser, Narendra Modi aser Uttar Pradesh Chief Minister, Yogi Adityanath na senden amendang tangokba noksa nung angur.

## India nung state temerüktiba award Chhattisgarh nem agütsü

**New Delhi, Yimpoksüi/ November 20 (Agencies):** Centre sorkari kum shia state temerüktibatem nem award agütsü, aser takum India nung state temerüktibaji Chhattisgarh shim; iba sülen tanabuba aser tasembuba jenjang nung Maharashtra aser Madhya Pradesh na lir.

Honibarnü New Delhi nung sentong ka nung India Tir, Ram Nath Kovind-i 'Swachh Survekshan Awards 2021' lema agütsü; iba sentong nung Union Housing & Urban Affairs Minister, Hardeep Singh Puri densema tongti ketdangsertem liasü.

Linük nung state temerüktiba award anguba sülen Chhattisgarh Chief Minister, Bhupesh Baghel-i, "Chhattisgarh nüburtemi merükmejsü atema

tejangraba nung inyakba atema ni state nüburtem nem tenüngsang agütsü. Iba sempet angütsüsa public lenirtem, ketdangsertem aser minister temi meranga inyakogo," ta metetdaksü.

Urban local bodies 100 dak tema aliba state tem category nung Maharashtra aser Madhya Pradesh nati tanabuba aser tasembuba jenjang angu. Urban local bodies 100 den tajemba aliba category nung temerüktiba state ji Jharkhand liasü aser tanabuba den tasembuba jenjangji Haryana aser Goa state nati angu, ta kasa osang nung shia lir.

Ano India nung yimti temerüktibaji Indore liasü; tang agi pongubenbuba Indore yimti nem iba sempet agütsü. Yimti temerüktibatem tanabuba aser

tasembuba jenjang nung Surat aser Vijaywada yimti na shim.

Nütsüng lakh 1 dak tema aliba yimtiem rongnung yimti temerüktiba 10 ji yamai lir- 1. Indore 2. Surat 3. Vijaywada 4. Navi Mumbai 5. New Delhi 6. Ambikapur 7. Tirupati 8. Pune 9. Noida aser 10. Ujjain yimtiem lir.

Kasa category nungsa yimti 25 rongnung jenjang teküboktibaji Uttar Pradesh yimti, Lucknow lir. Ano nütsüng lakh 1 den tajemba aliba yimtiem rongnung temerüktibaji Maharashtra kübok Vita yimti lir, iba sülen tanabuba aser tasembuba jenjang nung Lonavala aser Sasvad na lir.

Ganga ayong aliba jilatem rongnung temerüktibaji Varanasi lir, iba sülen tanabuba aser tasembuba jenjang nung Bihar kübok Munger aser Patna na lir.

## China-i India li atsünga agiba sorkari nangzüksüla: Rahul Gandhi

**New Delhi, November 20 (Agencies):** Ato kilonser, Narendra Modi-i aluyimba ozüng tasen asem agientsü sangdongba sülen anogo ka lir Honibarnü Congress lenir, Rahul Gandhi-i, China-i India nung li atsünga agibaji sorkari nangzüksüla, ta ashi.

China den arrtsülen tensa majungba dak sendakba nung mapang shia Congress party-i, sorkari iba onük atema junga meinyaker, ta aija arudar.

Hindi oshi nung Rahul Gandhi-i twitter ajanga, China nungeri asen litsü atsünga agiba ochi oji sorkari tang

nangzüksüla, ta metetdaksü.

Yaküm May ita nungi anüdoklen Ladakh nung China aser India sepaitem tsünga mepetmesü adokba sülen nungi Congress leniri mapang shia China den Line of Actual Control (LAC) dak sendakba nung sorkar dang tasüngdangba akar.

Brihostibarnü India aser China nati tekaratiba nung sepaitem jenjang nung senden 14buba amentsü atema bangjemogo; Ladakh kübok LAC nung tensa mejungi aliba tesemtem nungi sepaitem ainshitsü nükjidong yur iba senden amentsü.

Yaküm May 5 nü Ladakh arrtsülen India aser China sepaitem tsünga mepetmesü adoka liasü aser June 15 aonung Galwan Valley nung linük ana sepaitem tsünga raradang linük anaprongla nungi sepaitem asü.

Iba sülen sepaitem aser ketdangsertem jenjang nung linük anati senden aika amenba sülen mepetmesü aliba tesem aika nungi linük anapronglai sepaitem agienogo. Taküm February ita nung Pangong Lake tzükümlen nungi linük anaprongla sepaitem ainshi aser August ita nung Gogra area nungi sepaitem ainshia liasü.

## Aluyimertemi maneni longkak aittsü: SKM

**New Delhi, November 20 (Agencies):** Centre sorkari aluyimba ozüng tasen asemprong agientsü sangdongba sülen anogo ka lir Honibarnü aluyimertem lenirtemi, parnoki jelia sentong yanglua aliba methitemtsü aser maneni longkak aittsü, ta metetdaksü.

Krantikari Kisan Union nungi lenir, Darshan Pal Singh-i, November 22 nü aluyimertemi Lucknow nung rally agitsü aser November 29 nü tractor rally agia Parliament tashi aotsü, ta metetdaksü.

Item sentong ya yaküm November 26 nü aluyimertemi longkak aittsü sülen kum 1 abensaba nüngtem nung ayongzükba lir.

Paisa, onük aika anünga lir, anungji item onük ajak mebenet tashi aluyimertemi longkak aittsü, ta metetdaksü. Item onüktem rongnung aluyimertemi MSP akhangba, aluyimertem anema benoka aliba ken otem agientsü akhangba, Power Bill 2020 agientsü akhangba aser Air Quality Ordinance onüktem lir.

Aluyimertem unions-i tentetba Samyukt Kisan Morcha (SKM)-i, November 29 nü asüka mongpu tenzükba anogo nungi tenzükba anogo shia

aluyimer 500-i tractor rally agia Parliament tashi aotsü, ta tan ita tetenzüklen metetdakja liasü.

Amongnüa aluyimertem senden mena item onük atema o lemteptsü.

Honibarnü Bharatiya Kisan Union (Ugrahan) lenir, Joginder Singh Ugrahan-i, "Parliament tashi longkak aittsü sentong aliba dak sendakba nung SKM-i telemetba agitsü. Tang tashi nungbo iba sentong thinentsü atema lemteta mali. Amongnü SKM core committee senden nung telemetba kar agitsü," ta metetdaksü.

Paisa, Centre sorkari Parliament nung aluyimba ozüng asemprong magien tashi aluyimertemi

Tikri densema Delhi arrtsülen aliba tesem toktsür maotsü, ta metetdaksü.

Ato kilonser, Narendra Modi-i aluyimba ozüng asemprong agientsü, ta sangdongba sülen aluyimba dak sendakba onüktem nung aluyimer unions-i senden balala mendar aser asalentong tasen yangludar, ta osang ka ajanga metetdaksü.

Bharatiya Kisan Union lenir, Rakesh Tikait-ia, Parliament nung item ozüng asem magien tashi aluyimertemi longkak aittsü manentsü, ta metetdaksü.



November 20, 2021 nü 'World Heritage Week' mapang Agra Fort anasa health worker kati raliwalir ka nem coronavirus vaccine tutsüba noksa nung angur.

## Tanü Indian Navy-i INS Visakhapatnam semzüksü

**Mumbai, Yimpoksüi/ November 20 (Agencies):** Amongnü Project 15B kübok mezüngbuba rong- INS Visakhapatnam semzükba sentong Mumbai nung aliba Naval Dockyard nung agitsü aser iba sentong nung tongti tesemdangerji Defence Minister, Rajnath Singh asütsü, ta Honibarnü Indian Navy osang ka ajanga metetdaksü.

Ano November 28 nüa Indian Navy atema Kalvari Class 1 indang subramine pezübuba- Submarine Vela semzüksü, aser iba sentong nung tongti tesemdangerji Chief of the Naval Staff, Admiral Karambir Singh asütsü.

Honibarnü INS Visakhapatnam Commanding Officer (designate), Captain Birendra Singh Bains-i, "INS Visakhapatnam semzüksü atema onok renema lir. Iba rong

semzükba sülen onoki ano kar tendangtsü," ta metetdaksü.

"Visakhapatnam class rongtem ya linük nungi adokba steel agi yanglu aser item rong ya kum ter tejaklen semzükba Kolkata class destroyers sülen tang tasen yangluba lir. Item rong ya Directorate of Naval Design-i design asü aser M/s Mazagon Dock Shipbuilders Ltd, Mumbai-i yanglu. Rong pezüji linük nung tongtibang yimti pezü- Visakhapatnam, Mormugao, Imphal aser Surat nungja agia jaloktsü," ta Navy sangdong ajanga metetdaksü.

INS Visakhapatnam rong nung BEL, Bangalore-i yangluba Medium Range Surface nungi tenzükba Air Missile Systems, Brahmos Aerospace-i yangluba Surface to Surface Missiles, Tubes & Launchers aser Gun Mount ama raraba hadirtem aika keta lir.



November 20, 2021 nü New Delhi nung 'Swachh Survekshan Awards 2021' sentong nung India Tir, Ram Nath Kovind-i Chhattisgarh Chief Minister, Bhupesh Baghel nem cleanest state award agütsüdag tangokba noksa nung angur.



## Rotterdam nung police-i longkak aiterem dak injang akha



Hokolbarnü Rotterdam nung sorkari Covid-19 azüoktsü atema tenokdangba agütsüba anema longkak aitba noksa nung angur.

**Rotterdam, Yimpoksüi/ November 20 (Agencies):** Netherlands sorkari Covid-19 tashidak prokshia aoba nokdangtsü atema tenokdangba tesashi agütsür aliba anema Hokolbar aonung longkak aiterem dak Dutch Police-i injang khalokja nisung 7 yirutsü, ta Daily Mail sangdong ka ajanga metetdaksü. Ajisüaka police temi koba amala injang amshi, iba indang osang tejangja mali, ta kasa sangdong ajanga metetdaksü.

Maneni local media sangdong balala ajanga ashiba agi, police temi nisung 20 puogo.

Rotterdam Police-i ashiba agi, longkak aiteremi yimti kübok shopping streets tongtiba nung mi tsükloksü aser ibayongji police temi

parnok senshidaktsü atema tzü agi akha.

"Coolsingel nung longkak aitba sentong ya mazüokteti aküm. Longkak aiteremi tesem balala nung mi tsükloksü aser fireworks pokdaksü aser police temi kümdangshitsü atema injang akha. Tensa azüoktsü atema police tem aika iba tesemi yoka lir. Iba tesemi ME dena yokogo," ta Rotterdam Police-i tweet asü.

Iba tatalokba sülen Rotterdam nung police temi injang akhaba video aika social media nung temai adokogo. Video ka nung nisung ka dak injang khaloktsüba nguogo, ajisüaka iba ya tang tashi mejangjai lir.

Police-i Twitter ajanga ashiba agi, iba nisungba dak

shibai aser koma akha aji mejangja.

Europe nung sorkartemi coronavirus tashidak tali küma aoba ajanga tenokdangba agütsü tenzükogo, aser iba ajanga nisungtem aika mepelar.

Austria nungbo linük ajanga mokdanga ayuba sangdongogo aser Netherlands nunga tenokdangba kar agütsüogo. Germany, Czech Republic aser Slovakia nunga vaccine magi alibapurtem atema tenokdangba agütsür lir.

France nung tir Emmanuel Macron-i, vaccine telong junga agiba ajanga linük mokdanga ayutsü nungi jenbotsü, ta shiogo.

Kasa mapang nung Britian nung booster shot agütsü tenzükogo.

## Japan nung taruba küm Quad summit akatsü

**Tokyo, Yimpoksüi/ November 20 (Agencies):** Taruba küm Quad senden ayongzüka amentsü Japan-i mulunga agizükogo, ta White House indang Indo-Pacific coordinator Kurt Campbell-i Hokolbarnü ashi. Iba telok nung United States, India, Australia aser Japan dena lir.

Indo-Pacific aser tanga tesemtem nung China kanga kara renlokyonga aoba asadanga alitsü atema iba telok tetet.

Washington nung US Institute of Peace indang sentong nung o jembiba mapang Campbell-i 2022 küm Japan nung Quad senden amentsü aliba indang osang tejangja magütsü, ajisüaka Japan Times sangdong ka

ajanga ashiba agi, iba senden ya sangküm küm tetenzüklen amentsü akok, ta ashi.

Campbell-isa, India ya Quad nung kanga dang tongtibang züngsem ka aser New Delhi den tesendaktep tajungba küma yanglushitsü Washington mulungteter lir, ta ashi.

Paisa, aso 21buba nung India ya global stage nung tongtibang shilem agir ka akümtsü aser Vietnam aser linük kar den külemi Asia nung kanga tongtibang linük akümtsü.

China indang jembiba White House ketdangtsü ashiba agi, United States'-i partner tem den tesendaktep atsülangshiba ajanga China mesüngjemeteter aser China tir Xi Jinping-i Hombarnü virtual ka nung tir

Joe Biden dang Washington-i parnok tembarmem den tesendaktep yanglushiba ya Cold War tebilemdangba den kasa lir ta shiogo.

China den mangatettep adoker aliba mapang US-i Taiwan den economic dialogue sentong ka ayongzüka agitsü ta State Department-i sangdonger aliba mapang Quad senden indang osang sangdongogo. State Department-i ashiba agi, secretary for economic growth, energy and the environment, Jose Fernandez lenisüba nung Hombarnü tanabuba US-Taiwan Economic Prosperity Partnership Dialogue akatsü.

Iba inyakyim ya Beijing jashidaktsü atema Taipei den US tesendaktep tali ajungketshiba ka asütsü.



German Health Minister Jens Spahn-i Hokolbarnü, hopta ishika tsüngda Covid wara tamajungba küma odar aser taoba hopta dang nungi tang tensa tamajungba kümogo, ta ashiba den linük dang national emergency ka ajangshidar, ta ashi. German federal police officer temi Frankfurt, airport nung Palma de Mallorca nungi arurtem ket nung negative Corona test bena ali mali asadanga noksa nung angur.

## Britain nung plastic osettem nokdangtsü asadanger

**London, Yimpoksüi/ November 20 (Agencies):** Nokdangtsü akokba plastic janatem agintsütsü atema khen dang amshiba plastic auso aser cutlery aser polystyrene maroktem England nung nokdangtsü akok, ta sorkar sangdong ka ajanga Honibarnü metetdaksü.

England nung kümshia khen dang amshiba auso billion 1.1 aser khen dang amshiba cutlery tem billion 4.25 amshir aser item ka timba plastic dang, ajisüaka plastic tem ya shilem 10 dang tanaben amshiteter.

Hopta 12 tashi nüburttem aser shishilembartem den iba ken o benoka sensaksema sülen tanga lenmang ka bushitsü.


Sorkarisa, wet wipes, tobacco filters, sachets aser tang khen dang amshiba marok tem amala oset, koba ajanga tzü mopung menentsür, item osettem ya nokdangtsü ayongzüko.

"Plastic ajanga tzü mopung menentsüba aser talisa tzüyim nung aliba takütem dak kongshiba tali tejangjaba kümogo. Onoki plastic amshiba tajemba kümdaktsüner aser jana dang akümba plastic osettem nokdangter," ta environment minister George Eustice-i ashi.

"Onoki plastic straws, stirrers aser cotton bud tem amshibabo nokdangogo aser tang cutlery aser balloon stick tem nokdangner, kechiyong plastic melena item osettem nung sung amshitetsü."

England nung plastic straws aser stirrers aser plastic-stemmed cotton bud tem taoba küm nungi tenokdangba agütsüogo.

Single-use carrier bag tem amshitsü atema taa agiba ajanga 2015 küm nungi tenzüka supermarket tem nung item osettem amshiba shilem 95 agi tejamba kümogo.



Chinese video-sharing platform TikTok-i, video tem indang content tem azüoktsü tenangzüka agütsüba sülen Pakistan telecom regulator-i TikTok nokdangter aliba tang agi pezübenbuba lapoktsüogo. Pakistan Telecommunication Authority (PTA)-i iba platform ya July ita tenokdangba agüja liasü.

## Sudan nung coup anemer 40 süogo

**Khartoum, Yimpoksüi/ November 20 (Agencies):** Sudan nung taoba ita military-i sorkar atsüngtokba anema nokdakertem asür 40 jungogo, ta medic-i Honibarnü ashi. Tesüsa anogo ishika tejangdang lanur ka dak tekolak nung khar anepaluba aliba süogo.

Sudan indang general tongtiba Abdel Fattah al-Burhan-i October 25 nü sorkar atsüngtoka state of emergency benok aser civilian lenirtem pua ayu.

Military-i sorkar atsüngtokba ya alima küi aikati anemogo aser iba ajanga nüburttemi longkak ait tenzük.

Bodhbarnü longkak aitba mapang lendong tulu ataloka liasü aser iba lendong nung asür nisung 16 jungogo, ta medic temi ashi.

"November 17 nü injang agi tekolak aser tetsüng nung injang agi akhaba sülen ano nisung ka süogo," ta independent Central Committee of Sudanese

Doctors-i ashi. Pa arishi küm 16 liasü.

Bodhbarnü tepsetertem ya timba North Khartoum nungi liasü, ta parnokisa metetdaksü.

Police ketdangtsürtemi parnoki live ammunition mamshi ta ashiba den longkak aiterem senshidaktsü atema takok tashi tashiyim mamshi liasü, ta ashi. Parnoki North Khartoum nung longkak aiter ka dang asüba mangaoka lir.

Hokolbarnü tesem aika nung military-i sorkar atsüngtokba anema longkak aitogo. Nüburttemi lenmang nung barricades tem yanglu aser kasa mapang nung security force temi parnok senshidaktsü atema teargas khalokja liasü.

Sudanese Professionals Association (SPA)-i longkak aiterem dang maneni military anema nokdaksü ajungshiba den Hokolbarnü security force temi North Khartoum nung ki aser mosque aika meita ogo, ta ashi.



## CSIR-APEDA Skill Development Program tembangogo



**Dimapur, Yimpoksüi/ November 20, 2021 (TYO):** Nagaland Tool Room & Training Centre (NTTC), Dimapur nung November 15 nungi 19, 2021 tashi CSIR-Central Food Technological Research Institute (CFTRI) & Agricultural & Processed Food Products Export Development Authority (APEDA)-i Süngjanglijang, Süngolemba aser Spices nung 'Value Addition' indang training sentong anogo pungo tashi ayongzüka liasü, ta sangdong ajanga metetdaksü.

Hokolbarnü (19.11.2021) iba training tembangba sentong ka agia liasü, kong L. Mongkum,

President, BAN (Business Association of Nagas) tongti tesemdanger aser Taliwati Longchar IEDS, Joint Director & HoD, MSME Development Institute, Dimapur tetushi tesemdanger ama jaok.

Iba sentong nung, L. Mongkum Jamir-i, training agirtem dang tasa tasen atongtetsü aser entrepreneur ka ka akümtsü asoshi meranga inyaksü; aser lanur nem mapa maongka agütsütsü ajungshio.

Pei shimba wadang mashi ka nung tejakleni aotsü asoshi, tasa melenshia tajungba inyaka aotsü kanga tongtibang aser takok angutsü asoshi jangrabangra

aser bendanga agütsür inyakba dak tuluka keta lir, ta pai metetdaksü.

Financial institution aser market balala nung tesendaktep yanglutsütsü asoshi BAN-i entrepreneur tem yaritsü mulunga dang lir, ta Jamir-isa lephsia ashi.

Kasa sentong nung, tetushi tesemdanger, Taliwati Longchar-i, training agirtem dang metsübui pei shimba wadang nung 'value added service' agütsütsü ajungshia liasü.

Taliwati-isa, MSME nung register asüba ajanga financial institution balala nungi entrepreneur temi teyari agitsü asoshi lenmang angutsü indang lemsatep.

Iba training sentong atema 'facilitator' temji CFTRI nungi Dr. Ng. Iboyaima Singh, Chief Scientist, CSIR-CFTRI, Shailaza R aser Er. Sahu nung liasü. Iba training nung Dimapur aser Kohima nungi nisung 32 agi shilem agiogo aser iba training course tembanga training agir ajak nem CFTRI nungi certificate agütsüogo, ta kasa sangdong nung shia lir.

## Longnak nung Fruit Canning Factory tanaben lapok



Advisor, Horticulture & Borders Affairs Mhathung Yanthan-i, Longnak, Mokochung nung Fruit Canning Factory tanaben lapoktsüdang tangokba noksa nung angur.

**Mangkolemba, Yimpoksüi/ November 20, 2021 (TYO):** Brehostibarnü (18.11.2021) Advisor, Horticulture & Borders Affairs Mhathung Yanthan-i, Longnak, Mokochung nung Fruit Canning Factory tanaben lapoktsüogo, ta sangdong ajanga metetdaksü.

Longnak Canning Factory tanaben lapoktsü meranga inyakba atema, iba maparen nung dena alir ajak nem Advisor, Mhathung Yanthan-i tenüngsang agütsü.

Mhathung-i, taoba mapang inyakba ama iba factory junga achayangtsü nüngdaker ta pai metetdaksü aser lenla ajunga nung terenlok alitsü asoshi yimertem dang project ka ama aluyimba wadang nung temulung agütsütsü; aser tarutsü nunga amalitepa aser kati ka nungitta inyaksü ajungshia liasü.

Commissioner & Secretary, Horticulture, Anenla T Sato,

IAS-i okila jembia aser Deputy Director, Horticulture, Meyasashi ajanga Longnak Canning Factory indang 'report' tongmelang agi metetdaksü.

Kasa sentong nung, Additional Deputy Commissioner, Mangkolemba, Dharam Raj aser Chairman, Changki Village Council, Lemtinenba Amri nungeri jembio. Fruit Technological Officer, Longnak Aomrong-i tepela anküp o jembia aser Director, Horticulture & Mission Director (MIDH), Dr. Elithung Lotha menden liasü.

Longnak nung Fruit Canning Factory ya 1964 küm tenzük aser Quasi-Commercial unit ama 1974 küm May 5 nü iba factory lapoka liasü. Küm nung iba factory ajanga chiyongtsü balala (processed product) touzük 250 MT tashi yanglur. Iba factory tajungba yanglutsü atema 2006 küm maparen

ajunga anenja liasü. 2010 küm iba factory maparen tajungba melena inyaksü asalentong yanglutsü atema Department ajanga Central Food Technological Research Institute (CFTRI), Mysore nungi Expert Team ka nem mapa lemsütsü. Iba Expert Team ajanga factory yanglushitsü atema lakh 411.74 shi aotsü ta ashi, kong Planning Commission, Government of India ajanga iba factory atema sen lakh 100.00 tenla agütsü.

Tang, iba factory nung maparen (restoration work) tembangogo aser zükolak (Bamboo shoots), jiru (pineapple), kiwi, naring (orange), entsülashi (passion fruit) indang processed product tem yanglu tenzükogo.

Advisor Mhathung-isa Progeny Orchard, Longnak semdanga liasü, ta kasa sangdong nung shia lir.



OFFICE OF THE  
KOHIMA ONGPANGKONGTSÜR TELONGJEM  
KOHIMA -797001, NAGALAND.

## TAKOK TEPELA NUNG DENSEMER

Alemla Aoer nokinketeri sobutsü talila- Sari er saku yur medem, **Wb. Dr. S.C Jamir-i** ayak tabensa sobutsü- **PADMA BHUSHAN AWARD**, tzütelang nungi yur shilangba takok tepela nung, Kohima Ongpangkongtsür Telongjema oriri tena densemer.

Asen Teyanglur Tsüngremi Walunir taküm aser Pa jemer- Wt. Imkonglemla, wazüka moajang ta Kohima Ongpangkongtsür Telongjem sarasadem.

**Sd/-**  
**(Wt. Tiasola Jamir)**  
**President**

**Sd/-**  
**(Wt. Purkumla)**  
**General Secretary**

## PELABA LEMSATEPER

Onoki teti meima aliba **BENDANGSUA** (Merangkong) iba akümüli toktsür orr onok mangyim jashi tia nung alidang kija, kibong, arogo aser lokti balala shirnokisa nübo, rongsen aser sarasadem agi yaritepogo, nenok ajak dang kanga pelar.

Tsüngremi nenok ajak maneni moajang ta ozü sarasadem.

~ Temeim Kinungtsü, Chirnur & Semshirtem.



Aso : 03.02.1939  
Asü : 09.11.2021

## NBSE ajanga metetdaksür

**Dimapur, Yimpoksüi/ November 20, 2021 (TYO):** Nagaland Board of School Education-i sangdong ka nung, züngoksema aliba institution tekolaktem dang, 'Azadi Ki Amrit Mahotsav' nung shilem ka ama Constitution agizükba anogo November 26 nü State ajak nung Samvidan Diwas (Constitution Day) amungtsü asoshi Ministry of Education, Department of School Education & Literacy, Government of India-i tetuyuba agütsüba metetdaksüogo.

November 26, 2021 anepdang 11:00 meta nungi Central Hall, Parliament nung India Tir-i anir Constitution Day sentong agitsü. Iba sentong nung India Tatong Tir, Ato Kilonser, Speaker, Ministers, MPs aser tanga tongtibang nisungtem aruagi adentsü.

Iba sentong ya Sansad TV/ DD/Tanga TV channels aser online portal tem ajanga sayutsü.

Iba benjungmung sentong nung kaketshirtemi shilem agitetsü asoshi, Ministry of Parliamentary Affairs-i teküboklen agüja aliba portal ana amenoktsü.

Oshi 23 i.e., 22 official languages aser English nung 'Preamble to the Constitution' azüngtsü atema portal ji (<https://readpreamble.nic.in>) aser "Online Quiz on Constitutional Democracy" atema portal ji (<https://constitutionquiz.nic.in>) asütsü.

Ajaki shilem agitsü aser certificate agütsütsü atema item portal lapoktsütsü.

Anungji, Institution nung tekolakpur ajak dang iba benjungmung nung adentsü aser nüngdakba meratem agitsü asoshi mepishir. Covid-19 tetuyuba nung anidaka November 26, 2021 nü iba sentong den apet webinar/tanga inyakyim tem achayanga ayongzüktsü akok, ta kasa sangdong nung shia lir.

## 'The Burial' nung Jurnee Smollett denogo

**Yimpoksüi/November 20, 2021 (Agencies):** 'The Burial' indang cast rongnung Jurnee Smollett aniokogo. Amazon Studios indang film nung arishi küm 35 tain actress Jurnee-i Tommy Lee Jones aser Jamie Foxx den külemi shilem agiba angutsü. Harrison Ford melen Tommy-i iba project nung shilem agir asütsü.

Taruba film ya tatalokba otsü ka nung ajemdaker yanglutsü. Foxx-i iba drama film nung shilem agiba den pai Amazon Studios, Bobby Shriver Inc. aser Double Nickel Entertainment den longjemer produce asütsü.



Jurnee Smollett

Kasa project nung Bobby Shriver aser Double Nickel indang Adam Richman aser Jenette Kahn nati producer ama inyaksü. Doug Wright ajanga züluba script ka nungi Maggie Betts-i iba film direct asütsü.



# Asian Champions Trophy nung Rani Rampal masayatsü 1st Mister Mokokchung osang



Rani Rampal

**Yimpoksuü/November 20, 2021 (Agencies):** Captain Rani Rampal anisüngzüksü atema taruba ita Women's Asian Champions Trophy nung la masayatsü aser la melen iba asayamung nung vice-captain Savita-i anir Indian hockey tetsür team (züngsem 18)-i shilem agitsü.

Iba asayamung December 5 nungi 12, 2021 tashi Donghae, South Korea nung asayatsü. December 5 nü India pur campaign tenzüksü aser single-pool tournament nung parnok China, Korea, Japan, Thailand aser Malaysia team den tokteptsü lemküjka lir.

Savita, shiba nem 'FIH Goalkeeper of the Year' naroküm agütsü, team atema lai captain inyaksü. Tang India' tetsür hockey nung Captain teinyakdak Rani ya anisüngzüksü aser Bengaluru kübok rehabilitation nung mungdar.

Defender takotet Deep Grace Ekka-i vice-captain ama Savita nungittsü.

Forward asayar Lalremsiami o Sharmila Devi aser midfielder Salima Tete, shirnoki Tokyo Olympics nung shilem agi, iba asayamung nung parnok masayatsü. Asayar asemprongla junior squad nung dena lir, koba December 5, 2021 nungi South Africa nung tenzüka asayatsü aliba FIH

World Cup nung parnok asayatsü.

Namita Toppo, shiba Tokyo Olympics nung 'alternate player' liasü la den külem State (Odisha) nungi Lilima Minz na team nung dena lir.

Forward nung anaben Olympic nung shilem agir Vandana Katariya den Navneet Kaur nungeri shilem agiba angutsü. Kasa team nung Forward asayar Rajwinder Kaur, Mariana Kujur aser Sonika nunger anisemogo. Midfielder rongnung Sushila Chanu Pukhrabam, Nisha, Monika, Neha, Jyoti nunger dena lir.

Navjot Kaur aser asayar tasen Suman Devi Thoudam na 'alternate player' ama shimogo. Züngsem 18 squad nung asayar ka yiru mesüra Covid-19 ajanga iba asayamung nung shilem magitetsüsa kümra Kaur aser Devi na asayatetsü.

Chief coach Janneke Schopman-i ashiba agi, "Tia makai asayar kar temang nung timtem adoka aser Junior World Cup - South Africa atema Senior player tem Junior team nung adentsüsa aküm yongjia, aruya aliba Women's Asian Champions Trophy atema onoki team tajung ka shima lir ama bilemer."

Taoba head coach Sjoerd Marijne nungi mapa melenzükba sülen, his will be Schopman-i coach ama iba asayamung nung

mezüng shilem agitsü terenemba lir. Lai analytical coach ama India tetsür team den külemi inyaka liasü.

"Asayar tasen kar atema international sabang nung asayatsü asoshy iba asayamung maongka tajung asütsü aser onok training agiba alima dang sayutsü asoshi yongyar," ta Schopman-i ashi.

"Tokyo Olympics nung junga shilem agiba sülen iba asayamung nunga team-i tajungba asayatsü imlar saka yimyatem melenshir asayatsüla. Team dak aketba sempet tajungtiba sayutsü aser iba asayamung nung tanga team den toktepa asayatsü imlar," ta Schopman-i shisem.

Asian Champions Trophy tenzüka December 5 nü India-i Thailand den asayatsü; iba sülen December 6 nü parnoki Malaysia aser December 8 nü defending champion Korea den game tasembuba asayatsü. India team-i China aser Japan den asayatsü.

Pool nung temaba jenjang aser tanabuba jenjang tongtetter team ana tsüingda December 12, 2021 nü final asayatsü.

Tokyo Olympics sülen India tetsür team-i iba asayamung nung mezüng shilem agir asütsü. 2018 küm kasa asayamung nung Korea sülen India team runners-up nung tembang.

### SQUAD:

**Goalkeepers:** Savita (C), Rajani Etimarpu

**Defenders:** Deep Grace Ekka (VC), Udita, Nikki Pradhan, Gurjit Kaur

**Midfielders:** Nisha, Sushila Chanu Pukhrabam, Namita Toppo, Monika, Neha, Jyoti, Lilima Minz

**Forwards:** Navneet Kaur, Vandana Katariya, Rajwinder Kaur, Mariana Kujur, Sonika.



Mister Mokokchung Sb. Talikaba Longkumer (tiyong) den 1st Runner up Sb. Tinuwati (achichi) aser 2nd runner up Sb. Moanukshi Lemtur noksa nung angur

**Dimapur, Yimpoksuü/November 20, 2021 (TYO):** Vertex Entertainment Inc-i Mokokchung nung mezüng süa Mister Mokokchung yangi town hall Mokokchung nung takok ngua ayongzüka kaogo aser taküm 2021 küm asoshi Mr. Mokokchung ji arishi küm 23 tain contestant number 05, Sb. Talikaba Longkumer shimogo.

1st Runner up ji arishi küm 21 tain contestant No. 12, Sb. Tinuwati aser 2nd runner up ji arishi küm 21 tain contestant No. 05, Sb. Moanukshi Lemtur na liasü. Iba tetoktepa nung sangbang par 14-i shilem agia

liasü. Sub-titles senpet; Mr. Perfect Physique –Sb. Topeka, Mr. Congeniality –Sb. Tinuwati, Mr. Runway & Mr. Photogenic – Sb. Imanaakum, Mr. People Choice – Sb. Mezaba Kichu, Mr. Talent – Sb. Tiamaong, Mr. Perfect 10 – Sb. Talikaba Longkumer aser Mr. Personality – Khrishna Kumar parnoki agizük.

Iba sentong nung Mokokchung District Planning Officer, Imlikokba Longkumer liasü. Sentong nung kentener aser model-temi sempet balala ajanga tesentepertem saksalemdaktsü.

## Indonesia Masters: Sindhu aser Srikanth na tsükogo

**Bali, Yimpoksuü/November 20, 2021 (Agencies):** Honibarnü, Indonesia Masters Super 750 badminton asayamung tebur aser tetsür kija semifinal asaya nung Olympic medal anaben angula PV Sindhu aser külem India nunger Kidambi Srikanth naprongla tsükogo.

Tetsür kija semi final asaya nung, Sindhu-i Japan tsür Akane Yamaguchi makok. Kasa mapang, Denmark nunger seed tasembuba Anders Antonsen-i Srikanth tsükdakja liasü.

Taoba badminton asayamung balala nung Sindhu-i Yamaguchi madak aiben (12-7) kokdanga lir aser taküm tena anaben tashi asayaba mapang Sindhu-i asaya anaprongla koka lir. Ajisüaka, Indonesia Masters semifinal nung Sindhu-i 13-21, 9-21 agi Yamaguchi makok. Yamaguchi-i

ayong ayonga dang minute 32 nung Sindhu tsükdaktsü.

Yamaguchi-i seed pezübuba Korea tsür An Seyoung mesüra Thailand tsür Phittayaporn Chaiwan den final asayatsü.

Srikanth, shibai tebur kija quarterfinal nung külem India nunger HS Prannoy madak takok angu, semifinal nung pai 14-21, 9-21 agi Antonsen makok.

Taoba mapang world no. 1 Srikanth tamakok mangudang, pai Antonsen den meneptepa (3-3, 4-4, 5-5 ) asaya liasü. Ano, mezüng game nunga Srikanth 12-11 agi Antonsen tejekdang ser asaya, saka tatsüka dang lir Antonsen-i pa ajateta asaya.

Tanabuba game nung, asayar anaprongla point 4-4 kümadok, saka Antonsen-i Srikanth nem maongka magütsü point 8 tashi atonga ngua 12-4 kümadok.

## NBA-i 71buba Junior National Basketball Championship atema 'trials' agiogo



**Dimapur, Yimpoksuü/November 20, 2021 (TYO):** Sangküm January 4 nungi 10, 2022 tashi Indore, Madhya Pradesh nung ayongtsü aliba 71st Junior National Basketball Championship - Boys (U-18) atema selection agitsü asoshi Nagaland Basketball Association-i 'trials' indang mezüng shilem achaayanga agiogo, ta sangdong ajanga Nagaland Basketball Association, Secretary, Zasivi Meyase-i metetdaktsü. Iba trials indang mezüng

shilem November 19 aser 20, 2021 nü Christ King Higher Secondary School, Kohima nung agia liasü aser Kohima district nungi tebur 36 agi shilem agiogo.

National level nung State tenüng nungi shilem agitsü asoshi, selector temi asayar 12 meshimdang, trial' shilem ana nungi asayar 20 - 24 pool ka shimtsü, ta sangdong nung shia lir.

Tanabuba trial ya November 26, 2021 nikongdang 2:30 ako

nungi Christian Higher Secondary School, Dimapur nung agitsü. 01.01.2003 anogo mesüra iba anogo sülen asortemi iba trials nung shilem agitetsü. Iba trials nung adentsü atema temsüa alirtemi pei indang birth certificates aser Aadhar card bener arutsüla.

Dimapur trials dak sendakba nung osang metetsü atema item phone no. +91 98640 34256/70056 20288 nung tongteprateptsü akok, ta kasa sangdong ajanga metetdaktsü.

## IPL 2022 India nung asayatsü: Jay Shah

**Chennai, Yimpoksuü/November 20, 2021 (Agencies):** Honibarnü, Board of Control for Cricket in India (BCCI), Secretary, Jay Shah-i, sangküm Indian Premier League (IPL) 2022 ya India nung asayatsü, ta jangjatsüogo.

"Chepak nung Chennai Super Kings pur asaya reprangtsü asoshi ajaki yongya alitsü. Ibaji ataloktsü asoshi mapang talangka matatsü. 15buba IPL ya India nung asayatsü aser iba edition nung team tasen kar adentsü sentong lir. Iba asayamung atema auction sentong tuluka yakta agitsü," ta Chennai nung sentong ka agiba mapang Jay Shah-i ashi.

Chennai Super Kings puri IPL 2021 asayamung takok anguba indang jembiba mapang, Jay Shah-i, "Tesüiba küm nungi N

Srinivasan teyari ajanga CSK puri IPL balala nung takok ngua aru aser timtem mapang ajak nung pai team kanga nungitogo. Team longjemtsü asoshi Kasi Viswanathan-i shisatsü nung nungitta arudar. IPL Season ajak nung pai iba team asadangshia aser tebilemba lemsatepogo," ta ashi.

IPL 2021 asayamung CSK-i kokog aser MS Dhoni akhüm (captain) nung team-i IPL title pezübuba takok angur asütsü.

Iba asayamung takok anguba sülen, Chennai Super Kings (CSK) skipper, MS Dhoni-i sangküm IPL asayamung nung shilem agitsü asoshi telangzüba magütsü.

Sangküm IPL 2022 atema Ahmedabad aser Lucknow nungi team tasen ana bendenloktsü sentong lir.

## BILEMDANGANG

"Ochi rongsen ta shitetba rongsenjiang tenla sabangma nung yujang."